

光緒僊居志卷之十四

人物志中

忠義

仙居山高水長忠義之風盛於他邑然如蔣煜之義烈載於宋史一統志者而舊志遺之何耶昔魏文貞願為良臣不願為忠臣故歷史傳忠義必以死事著然如陳仁玉吳琮之倫雖未身殉其難而英烈之槩實足立頑而起懦故夷齊不死牧野之師血隱於首陽之下文信國拘囚於元尚欲黃冠而歸故鄉夫乃知忠不必殺身而義不必舍生也牽連而書之不亦可乎

光緒僊居志

卷十四

人物 忠義

一

宋 蔣煜補

張華宗

高申甫

趙時桌

王珏

陳仁玉補

元 吳揚

明 盧迴

鄭恕

顧碩

張約

應昌士

國朝 張大勇續

吳克明

吳琮父幹

潘聽濤張桓

蔣煜有文學宣和寇亂與煜遇欲妻以女煜拒之脅以拜亦不從寇曰吾戮汝矣煜伸頸就刃詈聲不絕而死煜性滑稽其臨事有立如此赤城志宋史一統志通志府志舊志失載

張華宗字君實寶祐間以明經補國學歷杭州揚州臨江軍教

授所至有聲開慶元年九月元兵陷臨江知軍事陳元桂死之  
元兵欲火文廟華宗挺身翼之曰甯殺我毋使先聖無依也遂

遇害

顧志鄭志  
通志

高申甫字宣卿嘉定十六年武科累知復州景陵縣元兵至率

民格鬪而死

赤城志顧志鄭志  
府志通志

趙時桌字寬甫咸淳四年進士授海鹽主簿與元兵對壘旬餘  
食盡力戰死父汭夫魏王廷美八世孫娶邑人滌知州陳充女  
始居仙居子若愚孫嗣衍字叔志有文學行義與朱木朱棊兄  
弟友王叔英銘其墓孫古銘從叔英游以忠義樂善見重於人

顧志鄭志府志  
通志靜學集

光緒僊居志

卷十四

人物 忠義

二

王珩字叔寶咸淳四年進士累官太學博士德祐丙子權知本  
州事時謝太后詔台州降元珩涕泣曰天子蒙塵臣節有在此  
詔詎可奉耶伯顏南下與兵部侍郎陳仁玉倡義民堅壁以守  
城既陷赴泮池水死焉元兵至欲取首級以獻功其姪賓虞服

珩冠帶甘自殘以全珩遺體

赤城新志顧志  
鄭志府志通志

陳仁玉字德公一字德翰號碧栖武科清卿正大之從子博洽  
工詞翰淳祐十一年以經筵列薦入史館補常州文學歷將作  
監丞開慶元年御筆特賜同進士出身十一月以秘書郎兼禮  
部郎官兼崇正殿說書除直秘閣浙東提刑兼知衢州得嘉定  
中趙清獻文集舊本重刻之自爲之序景定元年五月陞直華

文閣八月陞直敷文閣九月赴都供職歷浙東安撫使兵部侍郎告歸寓郡城德祐元年謝太后詔天下州郡降元仁玉與權知州事王珪募民死守兵敗隱黃巖海中石塘山戒子孫世世無仕元所著有遊志編菌譜行於世

寶慶會稽續志鄭志府志台州外書台州札記台郡

識小

吳揚字仲修少負大志有膂力好騎射至正十三年辟署黃巖州判官十六年處州睦溪盜起犯仙居遂陞州同知總制其鄉之義兵揚輒率衆屯於羅漢潭賊不敢進會有鄉民爲賊內應者凌晨襲其不備衆遂潰揚獨挺身格鬪手刃數人而死其子燾忻復率鄉兵擒賊并內應者剖心以祭其父有司以聞詔表

### 光緒僊居志

### 卷十四

人物 忠義

三

其里曰忠孝坊立忠烈廟於縣南以祀之長子煜襲爵擢燾縣

尹忻佐處州幕

顧志鄭志府志通志

盧迴字士恭洪武中貢入太學爲人疎俊爽朗不拘細行喜飲酒飲酣輒高歌人以爲狂及歷顯達折節恭慎歷戶部主事建文三年拜戶部侍郎四年六月靖難師入抗節不屈縛就刑長謳而死台人祀之八忠祠

明史廣輿記浙江通志

鄭恕字本忠洪武中歲貢工詩善書聚生徒談經爲時所宗任鄞縣訓導陞蕭縣知縣建文四年夏燕將王聰攻蕭恕率鄉兵拒戰敗而南奔尋被獲不屈以八月十七日誅死二女當配亦

死之

明史顧志雙志祠記浙江通志

顧碩字景蕃洪武間以通經儒士授山西石樓知縣擢吏部主事文皇入金陵卽帝位召之不赴棄官逃去爲富家牧牛閒至山椒水湄輒飲泣微咏每出牧攜一竹筍緘滕甚密暮歸卽枕之臥或問此中何所有珍之乃爾輒攢眉不荅嘗作飯牛行有日掛書不讀項羽傳火牛未用田單策至仁宗卽位盡赦諸死義家乃闢筍出衣冠服之別主人而歸詢其詳始知爲碩也

顧志

鄭志府志案此事似因景蕃有飯牛歌附會而爲之未可信也以舊志所有姑存之

著有石樓文稿藏於

家赤城新志

張約字存博邑諸生每以忠義自許嘉靖丙辰倭寇犯境約率家人禦於光明山之麓爲寇所執脅導入城厲聲罵曰恨不斫

光緒僊居志

卷十四

人物 忠義

四

賊奴萬段肯爲汝鄉導耶賊割其舌猶噴血罵不絕口而死郡守譚論率師至詣約死所爲文以弔之

顧志鄭志府志通志

應昌士字君甯號吉生丰儀俊偉美髭髯崇禎三年庚午黃石齋道周主浙試拔中十七名舉人十五年壬午特恩賜進士二十三人昌士與焉授安定知縣十六年十月闖賊破潼關遂圍安定昌士率兵民登陴效死守越月城陷被執賊不忍殺欲降之昌士奮罵不屈妻周氏與女貞年十六在旁亦奮罵賊先殺以脅之昌士笑曰各得死所矣十一月十九日械至蘭州僞帥親釋其縛延與同席飲酒數行從客勸曰識時勢者爲俊傑公何膠焉昌士鬚棘棘張舉杯擊僞帥首時漏二下卽席遇害僕

趙登親覩其事乃裹屍還安定與夫人合葬於東山 國朝定  
鼎士民追悼具呈督學宋琬琬批曰明之將亡闖賊肆虐潼關  
一破秦無堅城長吏望風納款將帥倒戟相迎獨安定應令以  
斗大孤城登陴誓守勢既不支身膏白刃巖巖大節真可與日  
月爭光允宜俎豆以孚明綸遂送入名宦祠康熙元年夏安定  
令烏程張貞侯以憂旋里義其一家死國難攜趙登載三骸歸  
窆於麻姑山麓

鄭志府志浙江通志陝西通志

乾隆中

賜謚節愍

勝朝殉節諸臣錄

張大勇字引南邑南姚岸人嘉慶庚申武舉有膽略智勇過人  
乾隆五十九年有台人李鶴皋寓大張村自言得天書寶劍有  
道法四方從而傳道者數千人謀爲亂大勇以狀牒縣申省鄒

### 光緒僊居志

### 卷十四

人物 忠義

五

令大訓遣楊典史紡緝爲鶴皋之黨所敗傷足鄒令自率兵往  
兵皆畏縮不敢進嘉慶元年十月大勇募義民數千同官兵進  
剿搗其巢獲鶴皋梟首示眾斬其黨二百餘人初鶴皋在黃巖  
結黨三千人仙居破賊之時黃巖匪黨來援至五部嶺聞鶴皋  
已誅乃散去然則鶴皋雖小醜若不早除其患亦未可量也

採訪

册

吳克明字培信號月溪廩生邑西高遷人嘗與族叔琮同筆硯  
琮但義殺賊克明協力佐之同治元年四月三日克復縣城五  
月援永康冒大雨行克周山下焚賊巢尋克芝應拯被虜婦女  
五百餘人七月官軍克處州賊猶踞縉雲不下八月克明會縉

雲東鄉民攻賊於盧堂陷陳死九月賊潰去收其屍歸葬克明  
平居奮發常曰賊吾仇也身非吾也卒踐其言子連城襲雲騎

尉世職

浙江忠義  
錄採訪冊

吳琮字炳讓一字玉叔咸豐己未副貢邑西後湖人也父幹字  
巨喬監生十一年十月二十七日粵賊僞侍王李世賢率賊數  
十萬入台先陷仙居繼陷郡城黃巖天台太平甯海十二月世  
賢回金華以僞爵延天義李元徠守仙城同治元年三年琮以  
賊初至時父幹以捍禦被傷致死首倡大義殺賊復讐約同志  
王翰等函致四鄉各率丁壯先誅賊之屯村落者二十九日殲  
田市卡賊四月朔義民數十萬齋抵城下明日東鄉義民亦至

光緒僊居志

卷十四

人物 忠義

六

圍攻兩晝夜克之草獲禽獮城賊數萬靡有子遺由是郡城黃  
太甯天暨温之樂清玉環俱以次收復而處之縉雲青田金之  
東陽永康爲賊踞如故士民洶洶恐賊復至而縉永又來乞援  
眾皆曰賊蹤密邇豈宜坐視與其以守爲戰不若以戰爲守琮  
遂率同志掃境內之眾裹糧赴之前後四出蒼嶺戰而死者百  
十餘人八月十六日廩生吳克琮率兵攻縉雲之盧堂陷陳死  
同死者百四十餘人先是巡撫左文襄宗棠獲棧天義羅賊致  
李世賢僞文言台事甚詳其畏仙居士民尤甚因奏言仙居出  
力士紳以副貢生吳琮爲最 以其父被害殺賊報仇英烈之  
風尤足矜式鄉里奉 旨紳民敵愾同仇深知大義殊堪嘉尚

著左宗棠傳旨嘉獎又奉 上諭台州各屬士民深明大義  
奮勇殺賊前已降旨褒獎該撫既知吳琮等最爲出力不妨奏  
請獎叙藉以收拾人心不致氣竭情渙尋保舉同知 賞戴  
藍翎五年劉守璈檄琮赴黃巖與諸生蔡福同招撫奇田匪黨  
百二十九人保加知府銜 賞換花翎而琮不樂外任援例  
授刑部員外郎奉大府檄赴浙江忠義局襄辦採訪後數年入  
都供職請假歸卒于家子成章諸生 平浙紀畧恪靖伯奏議黃  
巖縣志畫石集採訪冊  
潘聽濤字載楣號鑑湖諸生邑東馬洋人同治元年正月七日  
賊掠馬洋聽濤鳴鑼會民兵禦之力戰死賊怒火其村男女被  
殺者二百餘人張桓字熺風號清泉諸生邑城人訓蒙南鄉上

光緒僊居志

卷十四

人物 忠義

七

山湖壬戌二月十三日賊掠南鄉桓熺以大義被殺於栗樹園

採訪冊

孝友

邑之孝友名見國史者惟明朱煦一人蓋以王靜學嘗爲之傳也太史公曰閭巷之士砥行立名非附青雲之士烏能聲施後世豈不信哉然孝子自愛其親悌弟自友其兄顧恐實之未至耳曷嘗慕其名哉苟有務名之心則非真能孝友者矣然既有其實名必歸焉其著者書於國史否亦書於方志執筆者所宜盡心也惟虛有褒揚之詞而無實蹟可紀則固當在所略焉爾

宋 吳 沆

顧商卿 弟周卿 補

郭堯卿

鄭 憲

顧玉文

元

吳處仁

光緒僊居志

卷十四

人物 孝友

八

張文道 補

明

朱 煦

張宏宗

從子炳漢

戴彥信

應 昌

吳榮璧

應存素

張 援

楊治卿

應昌基

應昌禪

子爾健

國朝 朱 濂 父錫聰

彭之蟠

張相維

朱小三球

吳沆字仲亢淳熙二年武科歷知昭靖二州母老乞祠以武經大夫主管崇道觀割股和藥以愈母病及故廬墓三年縣令趙幼聞立純孝坊以旌之名其里曰孝義 顧志鄭志 府志通志

顧商卿字方子系出梁高士歡累世孝義化及猫犬父知言字

孚先通黃帝內經歲大疫襄良劑巡戶療治全活甚眾商卿嘗為鄉郡學官綦氏伯仲以爭門資叙廕久不決商卿諭以如是不但破產卽先內翰家聲掃地矣伯仲皆泣悔弟周卿字成子號拙軒嘉定癸未進士任奉化簿官至朝奉郎奉國軍簽判

宋學

士集台  
州外書

郭垚卿字子原晞宗第三子長兄森卿已得官仲兄明卿出後伯父垚卿該遺澤恩兄弟相遜卒與其季弟磊卿郡守爲立友于坊以表之後仕至兵馬都監

鄭志訂

鄭憲字彥仁雄飛猶子景定三年進士歷官太學博士德祐間元兵壓境憲奉母以逃歷深山中遇兵欲刃其母憲抱持號泣

光緒僊居志

卷十四

人物 孝友

九

以身翼之曰甯殺我遂俱遇害

赤城新志  
顧志通志

顧玉文字溫夫周卿之孫咸淳十年武科第一人德祐元兵至台其父被執玉文奮身捍之頸被數刃與父俱仆移時乃甦自

是支離身無完形矣退居事母孝養彌篤

赤城新志  
顧志通志

子鎔

字可範年十三有神童之目丞相吳堅以孫女妻之

台州外書

吳處仁字敬之其父爲元軍所驅巡山呼其子索銀以貸死處仁聞之卽趨軍語之曰銀吾所藏也容吾歸取以贖父及發窖則已爲人所得矣乃告軍曰銀已失矣吾戴吾頭來以代父死其弟困請前抱持又欲代其兄死眾愕然義之遂俱獲免詳見

翁森三孝傳

赤城新志  
顧志通志

張文道字希道世居縣南之薦谷父嗣宗爲宗人時舉後居南澗坊文道爲學務達倫理大義其事親孝而有禮居喪哀而有節事繼母視其嫡無不及焉遇兄弟有恩意元季兵起避去山中鄉人或竊取其家貲後值其人陽爲弗知者其人慚謝以所竊自歸文道謝遣之其寬厚皆類此洪武甲寅卒年五十一方孝孺銘其墓子六咸官蜀府典儀副遷龍溪丞

遜志齋集

朱煦嗣壽曾孫也父季用名楫以字行由人才授福州知府洪武十八年詔天下盡革今歲以上有司官吏爲民害者季用視事僅五月以例起入京吏一以法論罪作城築役嚴償重日費數十緡季用又病痢謂煦貲曰吾力豈足堪此吾旦夕死矣汝

### 光緒僊居志

### 卷十四

人物 孝友

十

取吾骨歸葬耳煦惶懼不敢離左右戒二弟熊正共守視之時同役告枉者甚眾或被極刑煦奮然曰吾無術以脫吾父訴不訴等死萬一吾父由訴獲免吾雖戮死萬萬無憾遂陳其詞於通政司通政司爲陳於上上乃赦季用而復其官緣煦訴復官者一十四人皆拜季用謝曰微君有孝子吾儕骨肉皆爲城下土矣已而煦感疾死季用傷煦死病益甚亦死人皆哀之黃巖王叔英爲作孝子傳

赤城新志 顧志 鄭志 府志 通志 明史 靜學集

張宏宗字世遠少失父事母孝養備至嘗再刲股和藥以進性輕財好施有老媪坐負官錢幾死乃傾囊贖之又有少年遺十金而哭於市亦如數與之郡縣以孝廉聞於上徵之不赴

顧志 鄭志

戴彥信字元敬父養原饒於財比鄰陳某坐籍沒而無貲詭言寄百金養原所遂并繫獄彥信痛父無辜訴於上願以身代父死詔釋養原而彥信竟死於獄人嗟悼之稱為孝子顧志鄭志

應昌字克盛號慎齋宗儒子少孤克自樹立藩司吏員任分宜縣典史介持不苟慈惠有聲民甚德之袁州四縣入明百五十年丞簿尉唯昌一人祀名宦母陳氏守志撫孤宏治庚戌昌走京師白母苦節得表閭會日者言母壽當盡即斷酒肉徒步歸省比抵家母固無恙而兄病疫甚劇晝夜走山谷穿虎豹羣檢藥物及尉分宜聞母訃不食五日蔬食三年比葬廬於墓側寢

光緒僊居志

卷十四

人物 孝友

十一

地久遂得痲疾眾舁之以歸終禫苦塊時年六十餘矣遇二親忌日輒號泣不食及年八十家人叩首請始一食家甚貧竭力營宗祠以祀先人族里感其孝率慕而行之以子良貴封翰林院編脩嘉靖四年卒年八十四顧志鄭志府志通志經野集分省人物考皇明書台郡識小

吳榮璧字廷望孝養父母百計經營以供甘旨每父母食必與妻竊視之父母色喜方敢退而嘗食及居喪哀毀寢地徧身齧黑三年不入私室其兄強之以肉田而哇之其從子炳漢孝行純篤類榮璧既貢當謁選而不忍別親其親強之曰吾望汝祿養汝不行何由不得祿得已赴京選如臯訓導將迎養而其親死炳漢聞訃搥胸痛哭嘔血數升不食七日而卒顧志府志

應存素字軒之號鳳林司寇大猷子嗜學能文六歲從大猷經邳河偶攜扁舟他適倏而河冰與巨艦相失崖遠糶空賴同舟賈人棗栗爲食存素每食私藏其半未幾棗栗漸匱進果者希存素乃出所藏以供父大猷嘆曰此兒孝非由學智不在年也弱冠值伯父助教大經卒於任大猷經營無措時存素新娶遂易匱具得數十金以進父喜甚券屋數楹酬之力辭勿獲泊析爨復匿券而公分其屋焉再中副車以明經司訓婺源後以次子朝卿貴封山西道監察御史

鄭志 府志

張援字存忠父祿爲匠者所搆提赴京師援從行父於舟中患痢援焚香告天願以身代日夕扶抱至手掬其臭穢抵京師例

### 光緒僊居志

### 卷十四

人物 孝友

十二

以朝廷興作民間占庇工匠者罰工彌重援人事其父出任其勞未嘗少懈事竣南還溺於吳江而死聞者悲之

顧志 鄭志 府志

楊治卿字君佐天性純孝父病閉結以指挑出之父死哀痛迫切卧棺側者三年母死亦然出入必告於親之靈以詩授生徒至蓼莪章未嘗不三復流涕也嘉靖間縣令姚公本崇給扁以

旌其孝

顧志 鄭志

應昌基字君肇號坦如朝卿次子性至孝甫四歲人與之果必懷歸奉母母不食不先食也八歲能誦五經解屬文十六補諸生二十食廩餼天啟辛酉恩貢北上聞父卒于永平徒跣扶襯

歸哀毀感疾而卒聞者傷之

鄭志 遺英

應昌禪字君成號斗輝大猷曾孫儻負異才博覽羣書爲人樂善而疾惡遇操行純謹者愛之慕之傾貲濟之不吝也浮薄鄙夫輒嫚罵不與語曾祖司寇祭田未置遂以己田爲諸房倡每嚴冬必出閒行見有衣履單寒者輒贍以布米天啟乙丑歲貢赴廷試卒于京子爾健字順侯爲文力追秦漢不屑屑治章句年十四補諸生性至孝聞父訃一號幾絕徒步扶櫬歸侍母病甚謹祈減齡以代與翁侍御明英善常資贍之及卒復易產經紀其喪 國朝順治己亥貢未仕卒

鄭志

朱濂字郁卿父錫聰官海鹽訓導以厚德著嘗出門見一人傍徨覓物詰之曰吾爲糧長今日齎金納庫至此失之當死杖下

### 光緒僊居志

### 卷十四

人物 孝友

十三

矣錫聰惻然問銀若干兩若干封遂入取銀如數授之其人視非己物然幸得免刑遂受之而去至秋錫聰往收租已登舟聞後有呼先生不置者回顧卽失金人也登岸與語其人欲致薄物謝還金恩嗤其多事急別欲行則舟已離岸矣至中流舟覆人皆溺死唯錫聰得免濂性至孝康熙甲寅寇亂賊械錫聰繫之寨刑具畢張濂請以身代諸楚備嘗而不知其家之所有早已入他賊橐矣械濂送郡南岸賊帥曰餉戶至矣又加鞭扑血淋兩股濂曰吾得全老父死無恨矣帥感其孝釋之

府志  
論外編

彭之蟠號牧齋邑增生善事親飲食衣服必承歡心親歿殯葬

之事俱獨任之不以累昆季也邑人稱純孝焉

府志

張相維號墨莊康熙中貢博學敦行爲時所稱嘗代其兄羈繫  
賊寨凍餓幾斃賊訊知其爲兄也遂釋之

府志

朱小三球者湯壩頭人兄名三球故人呼爲小三球性至孝食  
貧養母母食白米已食糠粃食久糞結以致號泣於野人始知  
之一日母思肉不能得遂割股肉以進其篤孝如此道光閒人

也

採訪冊

光緒僊居志

卷十四

人物 孝友

十四